

FAILIMON

Irapa Reoro Vo Vukuo Iava

Pol vo pasio rigatoreva tuukepa kepa-ia toupaooro eisi Rom urui-ia 61 o 63 yia Krai vo kavauaro isivaaro iava. Vo rigato purareva rera iare rera vatetoaaro ro Failimon ira Pol vo reoro uvuoro porero viropa oa iava va sirova uturoepa Krai oirao piepaoro. Uva iravu kovopato Onisimas Failimon reraaro, ira torireva Failimon arova vore Rom uva voa oisoa Pol tapo toupaveve, oa iava oisoa Krai oirao piepareve, uvare rera vovouaro porereva. Oisi-a eisi osa iava Failimon akereva Pol oiso, E uvuipau ei ra rera Onisimas vorevira ou pieri, uvare vii araokotoaaro rera-a ro vo Krai vaisiario-ia. Ra rera ou pieoro rerapa sirao vao-ia rera vo vuriaro vao oa purareva.

1. Aviavi pie reoro rigatoreva Pol, 1-3.
2. Ora rera vaoro sirao vovou Failimon-pa, 4-7.
3. Failimon arereva Pol oiso ra vorevira Onisimas ou pieri, 8-22.
4. Ovoiopa reoro-ia veoro vokireva Pol, 23-25.

¹⁻² ✧ Ragai-a vao Pol ragoa tuukepa kepa-ia toupaaovi, uvare Krai-pa kovopato-a ragai. Uva vegei-a vao ora ro Timoti vii araokotoareiaro ora ragai, vegoa vo rigato puravevoi viipa Failimon. Uvare viipa sirao pavaeira vo osa Krai-pa kovopariveira. Oire uva voeoro rutu tapopa vo rigato-a vao-ia, oearoa vii vo kepaoro-ia

✧ **1:1-2:** Ef 3:1; Fl 2:25; Kl 4:17

ora gurupaaveira lotu purapasa. Ora o tapo vigei taataavaaro Apia iriapa tapo vo rigato puravevoi, ora ro tapopa Akipas ira vegei tapo vuri vovourova ora upoparoveira.

³ Uva variriparai Pautoa iare vigei aitearo ora Jisas Krai vigei Turaroaro oiso ra gavaure vovou purasi visii-ia tauvaa vateoro visiipa.

Oirao Pie Vovouaro Failimon Ora Siraopa Vovou Aue-ia Turaro

⁴ ✧ Ari ita, vosa variria purapaoro vii vaisipaavo Failimon. Ora vosa viire rugoopaoro vearo vaisi vuurapa vaisi purapaavo ragai reraaro-ia Pauto.

⁵ Vo uvare vii iava uvupaaveira vo oearovu ruvara-ia. Uvare vii-a eva viigoa oearovu rutupa siraopaveira voeao vii voeaaro, vo rara goruvira rutu oirao pie vovou purapari Turaro-ia Jisas.

⁶ ✧ Uva oiso variripaoro viire rugooparai oiso, Vearopai rutu vo osa ora vii vaaro oirao pie vovou kareke pieri oearovu rutupa oirara. Oire ra va iava vii-ia vo vovou eveioro oiraopavira rutu varaao oirao pieve vara-ia taraioro vearopara, oara vigeipa Krai Jisas-ia tupaaveira, vo osa rera tapo ora tavosipavio.

⁷ ✧ Oiso osa va eva, araoko, vii vaaro sirao vovou voearopa Pauto voearoaro. Oa iava rorupaavo rutu, uvare va-a eva oa ragai vovouaro varaata pievoi rutu. Ari ita, igei rutu varaata pierivora igei vao Pauto voeaaro.

✧ **1:4:** Kl 1:3-7; Ro 1:8-9 ✧ **1:6:** Je 2:14-20; Fl 1:9 ✧ **1:7:** 2 Ko 7:13

Pol Failimon Tavireva, Viipa Ruipaparai Rutu Ra Onisimas Ou Pieri Ora Vii Iare Oiso Rutu Osa Araokoto Oara

⁸ Oire uva vearo vovou-a vii vaaro oa-ia taraipaoro uvuiparai ra oiso vii tavia goruvira, Ragai vo rearo uvu iraori, uvare vegei araorei-a vo Krai vaiaro-ia.

⁹ Ari ita, viipa siraoparaveira rutu. Eva-a oa vituaro iava gavaure visivi vii arepaavoi. Ragai a vao avukatoavi Pol, ragoa tuukepa kepa-ia tupaavoi Krai-pa kovopato.

¹⁰ Oire uva oisi-a oiso osa ragavira rerapa ro-ia Onisimas vii arepaavoi, oiso ra rera tauvari ira viipa kovo roveve. Oa iava torireva vii arova. Uvare rera-a ira oiso rutu tupaaveira, ragai oviitoaro. Vao vituaro iava uvare tuukepa kepa-ia tupaoro Krai iava rera taviava. Oa iava ragai vo rearo uvuoro Krai oirao pieriva. Oa iava Airepa Tootoo rutu ouveva.

¹¹ Ari ita, voari tuariri viapau vearo kovo vai purapaveva viipa. Ari vo vokio-ia uvuiparoi rutu ra vearo kovo rutu purapaveve vegei rutupa ora vii.

¹² Oire uva rera arupaavoi vovevira vii iare. Uva rera-ia ora ragai iava vovouisi rutu tupaavoi vii iare siraovira.

¹³ Ari ita, rerapa ruipa ragaparai rutu oiso ra vovio raga ragai ruvara-ia tupaaveve, vo uva tuukepa kepa-ia tupaavoi. Aue iava uvare oearovupa siposipopaaveira Vearo Siposipo iava. Oire ra oisi ragai ruvara-ia touoro ragai tupaaveve vii vo tavukiaro ouoro.

¹⁴ Ari viapau uvuiparai ra goruvira rera-ia pitupa vo raga ragai ruvara-ia, vosa viapau vearo

vaisi pura roвори rera-ia. Ari ita, reasiparai oiso ra vii tavia oiso, “Ragai tauvari.” Viapau. Ari vii raga vo rugooaro vegei-ia. Oa-ia uvuipauei ra vegei tauvari vii vo ruipaaro sirova.

¹⁵ Ari ita, ragai oiso rugorugooparai, Pautoa vai vo ruipaaro sirova torireva vii arova. Oire uva voa-a evoa uvava voreoro taru vii ruvara-ia riro kaekaevira rutu toupavevere. Iu, uva oiraopavira rutu-a eisi.

¹⁶ ✧ Vo vokio vao oa-ia viapau oiso Onisimas toupavevoi osa voari tuariri akukuvira oisoa kovo ragapareve. Viapau. Uvare vo vokio-ia oiso rutu toupavevoi, Rera-a ro-ia vegei araokotoaaro vo Krai vaisiario-ia. Eva-a oa-ia kovopa irarapa pute pievira toupavevoi. Eisi osa iava uvuipaveiei ra rirovira rutu rerapa siraopave. Oire vosa oiso rugorugoopau rore Onisimas, Ragaipa kovopato ro-ia ora ragai araokotoaaro vo Turaro vaisiario-ia, uva eisi osa rugoopaoro uvuipauei ra rirovira rutu rerapa siraopau vo sirao-ia pute pievira osa rerapa siraoparaveira.

¹⁷ Ari ita, vosa oiso ragaire rugoopau, Vatetoa oaa rutu-a ro-ia Pol, uva uvuipauei ra rerare tapo oisi rugoou, vorevira ora vii iare rera voreoro ro-ia Onisimas.

¹⁸ ✧ E vuria vai peira rera-ia vii-ia ora vo vii orekerovu avu vaiaro-ia? Vosa oisi oarai pape, oire uva uvuiparai ra viipa oarai kare piea.

¹⁹ Oire uva va vao oa kekepari oreoa rigatopaavoi ora ragai Pol vavaearo raga iava. Oa-ia oiso puraparai, Iu, oiraopavira rutu viipa oara kare pieavere. Uva uvuiparai ra oiso vii

tavia, Easi riroa rutu epao oa ou ragariva ragai ruvara-ia, uvare vii siposipo ragapaavora Vearo Siposipo iava. Oa iava Jisas oirao pieoro Airepa Tootoo ourivora.

²⁰ Oire araokotoa oaa, vii Failimon arepaavoi oiso ra oisi eisi va purari. Uvare tavosivira rutu toupavevoi vo Krai vaiiario-ia. Uva va-a vao oa-ia uvuipaei ra oisi iava ragai vovouaro varaata pieri rutu, vo osa vii tauvareve Turaro oisi eisi piepasa.

²¹ Ari ita, vii-ia taraipaoro oiso viipa vo pasio rigatoavoi. Oiso osa ragavira uvuipaei ra oisi va purari. Uvare oiso ragavira vii-ia taraiparai, evara-ia pute pievira rutu taru orekerovu rutu oisi purarivere rara ragaipa.

²² Oire uva oisi-a eisi osa ragaipa oai tugia vai ravaavira vatatopori. Ari ita, Pauto oirao piepaavoi rutu, oiso ra visii rutu varaaro varirira vearovira rutu uvupareve. Oa iava ragaipa raiva purarevere vao oa-ia vorevira voreravere visii tapo toupasa.

Ovoioa Reoro Vatareva Pol

²³ Oire uva oreovu-a vao-ia vo osa Epafra vearo voki purarevoi viiva. Ira oisoa ragai tapo toupareve vo tuukepa kepa-ia, uvare rera tapo Krai-pa kovopato.

²⁴ ✧ Ora voeao tapo Mak vase, ora Aristakas, ora Dimas, ora Luk oea rutu tapo viiva vearo voki purapaivoi, voeao oea oisoa ragai tapo kovopaive.

✧ **1:24:** Ap 12:12; Kl 4:10

²⁵ Oire uva ragai-a vao variriparai Turaro iare Jisas Krai, oisore ra visiipa tauva vatareve visii viraakoro rutu. Ovoiei.
Ragai-a vao, Pol.

AIREPA VAE REO OVOI
The New Testament in the Rotokas Language of Papua
New Guinea
Nupela Testamen long tokples Rotokas long Niugini
copyright © 1982 Wycliffe Bible Translators, Inc.

Language: Rotokas

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-20

PDF generated using Haiola and XeLaTeX on 18 Apr 2025 from source files dated 31 Aug 2023

1713bce3-5a15-5918-82c1-6b80c12df3bb